



Broj: 02/1-50-1-22-37/09

Dana, 12.5.2009.godine

Z A P I S N I K

sa 37. sjednice Ustavnopravne komisije Doma naroda Parlamentarne skupštine BiH održane 12.5.2009. godine.

Sjednica je održana 12.5.2009. godine sa početkom u 13,30 sati.

Sjednici su prisustvovali članovi Komisije:

1. Ivo Miro Jović,
2. Slobodan Šaraba,
3. dr Hilmo Neimarlija,
4. Zoran Koprivica,

Sjednici je prisustvovao i sekretar Komisije, dr. Zijad Hasić.

Od gostiju, sjednici Komisije prisustvovali su: Velibor Lučić i Dragiša Mekić iz Ministarstva za vanjsku trgovinu i ekonomske odnose BiH; Biljana Čamur, pomoćnica ministra civilnih poslova BiH; Zoran Perković, pomoćnik ministra vanjskih poslova BiH i Zoran Brkić, viši stručni saradnik Parlamentarne skupštine BiH.

Na početku sjednice, vođena je rasprava o tačkama dnevnog reda.

Na prijedlog predsjedavajućeg Komisije, **Ive Mire Jovića**, članovi Komisije su usvojili slijedeći

D N E V N I R E D

1. Verificiranje Zapisnika 36. sjednice Komisije;
2. Realiziranje ranije donesenih zaključaka;
3. Prijedlog okvirnog zakona o osnovama naučnoistraživačke djelatnosti i koordinaciji unutarne i međunarodne naučnoistraživačke saradnje: predlažać Vijeće ministara BiH (osnovni zakonodavni postupak: Postupak u nadležnoj Komisiji čl.102.-107. Poslovnika);
4. Prijedlog zakona o kontroli vanjskotrgovinskog prometa roba i usluga od strateške važnosti za sigurnost Bosne i Hercegovine; predlažać Vijeće ministara BiH; (usaglašenost s Ustavom i pravnim sistemom: član 97. Poslovnika);
5. Prijedlog zakona o postupku zaključivanja i izvršavanja međunarodnih ugovora; predlažać Vijeće ministara BiH; (usaglašenost s Ustavom i pravnim sistemom : član 97. Poslovnika);
6. Prijedlog zakona o izmjenama i dopunama Zakona o službi u Oružanim snagama Bosne i Hercegovine; predlažać Vijeće ministara BiH; (usaglašenost s Ustavom i pravnim sistemom : član 97. Poslovnika);
7. Ostala pitanja
 - a. Zahtjev za autentično tumačenje člana 99. Zakona o veterinarstvu u Bosni i Hercegovini („Službeni glasnik BiH, broj:34/02), podnosioc zahtjeva Općina Tuzla, Služba za razvoj i poduzetništvo).

Ad. 1. Verificiranje Zapisnika 36. sjednice Komisije

Ivo Miro Jović, predsjedavajući Komisije, predložio je diskusiju o ovoj tački Dnevnog reda.

Nije bilo diskusije o Zapisniku s 36. sjednice.

Nakon toga, Komisija je jednoglasno usvojila zapisnik 36. sjednice.

Ad. 2. Realiziranje ranije donesenih zaključaka

U uvodu za ovu tačku dnevnog reda, **Ivo Miro Jović**, predsjedavajući Komisije, predložio je da sekretar Komisije, po običaju, prezentira stanje zaključaka i njihove realizacije.

Sekretar Komisije, **dr Zijad Hasić**, upoznao je članove Komisije o stanju zaključaka, konstatirajući da je članovima Komisije dostavio pismeni pregled zaključaka i njihove dosadašnje realizacije.

U pogledu rješavanja predmeta autentičnih tumačenja i prečišćenih tekstova zakona za čije je razmatranje nadležna Ustavnopravna komisija, predsjedavajući Komisije, Ivo Miro Jović je konstatirao da će u drugoj polovici narednog mjeseca biti organizirana zajednička sjednica ustavnopravnih komisija oba doma Parlamentarne skupštine, na kojoj će se pristupiti njihovom razmatranju i rješavanju.

Nakon toga, članovi Ustavnopravne komisije Doma naroda Parlamentarne skupštine Bosne i Hercegovine primili su k znanju prezentaciju zaključaka.

Ad. 3. Prijedlog okvirnog zakona o osnovama naučnoistraživačke djelatnosti i koordinaciji unutarnje i međunarodne naučnoistraživačke saradnje: predlagač Vijeće ministara BiH

U uvodu za ovu tačku dnevnog reda, **Ivo Miro Jović**, predsjedavajući Komisije, ukazao je na sljedeće:

Predlagač Vijeće ministara Bosne i Hercegovine dostavilo je, 9.3.2009. godine, Domu naroda Parlamentarne skupštine BiH Prijedlog okvirnog zakona o osnovama naučnoistraživačke djelatnosti i koordinaciji unutarnje i međunarodne naučnoistraživačke saradnje Bosne i Hercegovine, radi razmatranja i usvajanja. Ustavnopravna komisija Doma naroda Parlamentarne skupštine BiH, na 35. sjednici, održanoj 14.4.2009. godine, razmatralo je, Prijedlog okvirnog zakona o osnovama naučnoistraživačke djelatnosti i koordinaciji unutarnje i međunarodne naučnoistraživačke saradnje Bosne i Hercegovine, predlagača Vijeća ministara Bosne i Hercegovine. Tada je, nakon provedene rasprave, Ustavnopravna komisija Doma naroda Parlamentarne skupštine Bosne i Hercegovine s pet glasova „za“ i jednim glasom „suzdržan“ utvrdilo sljedeće:

1. Postoji valjan ustavnopravni osnov za donošenje Okvirnog zakona o osnovama naučnoistraživačke djelatnosti i koordinaciji unutarnje i međunarodne naučnoistraživačke saradnje Bosne i Hercegovine,
2. Ponuđeni tekst zakona je usaglašen s Ustavom Bosne i Hercegovine i pravnim sistemom;
3. Ponuđeni tekst zakona može se uputiti u daljnju zakonodavnu proceduru.

Komisija je, zatim, s pet glasova „za“ i jednim glasom „suzdržan“ podržala načela predloženog Zakona. Dom naroda Parlamentarne skupštine Bosne i Hercegovine je na 28. sjednici održanoj 27.4.2009. godine, usvojio Prijedlog okvirnog zakona o osnovama naučnoistraživačke djelatnosti i koordinaciji unutarnje i međunarodne naučnoistraživačke saradnje Bosne i Hercegovine, u prvom čitanju.

Nakon uvodnih napomena, Ivo Miro Jović je konstatirao da je Zoran Koprivica uložio pet amandmana na prijedlog ovog zakona. Predložio je rpravu o prijedlogu zakona i predloženim amandmanima.

Zoran Koprivica je kratko obrazložio amandmane koje je uložio, ističući da oni poboljšavaju tekst Prijedloga zakona, a u cjelosti odgovaraju usvojenim amandmanima u Predstavničkom domu Parlamentarne skupštine Bosne i Hercegovine.

Nakon provedene rasprave, Ustavnopravna komisija Doma naroda Parlamentarne skupštine Bosne i Hercegovine, je s tri glasa „za“ i „jednim „suzdržan“ usvojila Prijedlog predsjedavajućeg Komisije, da se o svim amandmanima Zorana Koprivice izjasne u cjelosti.

Komisija je, zatim, nakon glasanja, s tri glasa „za“ i „jednim glasom „suzdržan“ usvojila sljedeće amandmane:

Amandman I

U članu 1. iza riječi: „unutar Bosne i Hercegovine“ dodaju se riječi „njihovo finansiranje“.

Amandman II

U članu 8. u stavu (3) riječ: „susretnog“ mijenja se riječju „koordiniranog“, a nakon riječi: „planiranja“ briše se tačka i dodaju riječi: „i aktivnosti Ministarstva civilnih poslova BiH, entitetskih i kantonalnih ministarstava“.

Amandman III

U članu 8. u stavu (4) koji postaje stav (3) riječ „saglasnost“ mijenja se riječima: „mišljenje“.

Amandman IV

U članu 11. u stavu (2) u tački b), riječi: „daje doprinos izradi“ mijenjaju se riječima „učestvuje u izradi“.

Amandman V

U članu 11. u stavu (1) u tački m) riječ: „jednoglasno“ mijenja se riječju „koncenzusom“.

Nakon provedene rasprave Ustavnopravna komisija Doma naroda Parlamentarne skupštine Bosne i Hercegovine je s tri glasa „za“ i jednim glasom „protiv“ utvrdila sljedeće:

1. Ustavnopravna komisija jednoglasno prihvata tekst Okvirnog zakona o osnovama naučnoistraživačke djelatnosti i koordinaciji unutarnje i međunarodne naučnoistraživačke saradnje Bosne i Hercegovine, s usvojenim amandmanima, te predlaže Domu naroda da usvoji Zakon s amandmanima;
2. U skladu s odredbom člana 107. Poslovnika, za izvjestioca pred Domom, Komisija imenuje Ivu Miru Jovića, predsjedavajućeg Komisije.

Ad 4. Prijedlog zakona o kontroli vanjskotrgovinskog prometa roba i usluga od strateške važnosti za sigurnost Bosne i Hercegovine; predlagač Vijeće ministara BiH

U vezi ove tačke, **Ivo Miro Jović**, predsjedavajući Komisije, ukazao je na slijedeće:

Predlagač, Vijeće ministara Bosne i Hercegovine, dostavio je, 17.3.2009. godine, Domu naroda Parlamentarne skupštine BiH Prijedlog zakona o kontroli vanjskotrgovinskog prometa roba i usluga od strateške važnosti za sigurnost Bosne i Hercegovine, radi razmatranja i usvajanja.
Predložio je diskusiju o Prijedlogu zakona.

Zoran Koprivica je istakao da u Prijedlogu ovog zakona nije naveden materijalni osnov iz koga bi proizlazila nadležnost Parlamentarne skupštine Bosne i Hercegovine za njegovo donošenje. Smatra da se njime oduzima nadležnost entitetskih organa uprave i derogiraju nadležnosti utvrđene Ustavom Republike Srpske.

Ivo Miro Jović, predsjedavajući Komisije, smatra da u prijedlogu Zakona nisu pravilno navedene Ustavne odredbe kojima se regulira nadležnost Bosne i Hercegovine iz oblasti koju regulira ovaj zakon.

Dragiša Mekić, u ime predlagača, je potom konstatirao da je veliki broj odredaba iz predloženog Zakona identičan sa već postojećim odredbama zakona koji reguliraju ovu oblast, te da se njime ne derogiraju entitetske nadležnosti. Smatra da je predloženi zakon u skladu s Ustavom i pravnim sistemom Bosne i Hercegovine.

Nakon provedene rasprave Ustavnopravna komisija Doma naroda Parlamentarne skupštine Bosne i Hercegovine je s dva glasa “za” i dva glasa “suzdržan” utvrdila slijedeće:

1. Postoji valjan ustavnopravni osnov za donošenje Zakona o kontroli vanjskotrgovinskog prometa roba i usluga od strateške važnosti za sigurnost Bosne i Hercegovine;
2. Ponuđeni tekst zakona je usaglašen sa Ustavom Bosne i Hercegovine i pravnim sistemom;
3. Ponuđeni tekst zakona može se uputiti u daljnju zakonodavnu proceduru.

Ad 5. Prijedlog zakona o postupku zaključivanja i izvršavanja međunarodnih ugovora; predlagač Vijeće ministara BiH

U vezi ove tačke dnevnog reda, **Ivo Miro Jović**, predsjedavajući Komisije, ukazao je na slijedeće: Predlagač, Vijeće ministara Bosne i Hercegovine, dostavio je, 17.3.2009. godine, Domu naroda Parlamentarne skupštine BiH Prijedlog zakona o postupku zaključivanja i izvršavanja međunarodnih ugovora, radi razmatranja i usvajanja.

Predložio je diskusiju o Prijedlogu zakona.

Nije bilo rasprave o prijedlogu ovog zakona

Zatim je Ustavnopravna komisija Doma naroda Parlamentarne skupštine Bosne i Hercegovine, jednoglasno utvrdila slijedeće:

1. Postoji valjan ustavnopravni osnov za donošenje zakona o postupku zaključivanja i izvršavanja međunarodnih ugovora;
2. Ponuđeni tekst zakona je usaglašen sa Ustavom Bosne i Hercegovine i pravnim sistemom;
3. Ponuđeni tekst zakona može se uputiti u daljnju zakonodavnu proceduru.

Ad 6. Prijedlog zakona o izmjenama i dopunama Zakona o službi u Oružanim snagama Bosne i Hercegovine; predlagač Vijeće ministara BiH

U uvodu za ovu tačku dnevnog reda, **Ivo Miro Jović**, predsjedavajući Komisije, ukazao je na slijedeće:

Predlagač, Vijeće ministara Bosne i Hercegovine, dostavio je, 11.2.2009. godine, Domu naroda Parlamentarne skupštine BiH Prijedlog zakona o izmjenama i dopunama Zakona o službi u oružanim snagama Bosne i Hercegovine, radi razmatranja i usvajanja.

Predložio je diskusiju o Prijedlogu zakona.

Nakon kraće rasprave Ustavnopravna komisija Doma naroda Parlamentarne skupštine Bosne i Hercegovine je jednoglasno utvrdila slijedeće:

1. Postoji valjan ustavnopravni osnov za donošenje zakona o izmjenama i dopunama Zakona o službi u oružanim snagama Bosne i Hercegovine,
2. Ponuđeni tekst zakona je usaglašen sa Ustavom Bosne i Hercegovine i pravnim sistemom;
3. Ponuđeni tekst zakona može se uputiti u daljnju zakonodavnu proceduru.

Ad. 7. Ostala pitanja

a. Zahtjev za autentično tumačenje člana 99. Zakona o veterinarstvu u Bosni i Hercegovini („Službeni glasnik BiH, broj:34/02), podnosioc zahtjeva Općina Tuzla, Služba za razvoj i poduzetništvo).

U vezi ove tačke dnevnog reda, **Ivo Miro Jović**, predsjedavajući Komisije je predložio da dr Zijad Hasić, tajnik Ustavnopravne komisije, da' uvod u vezi ovog predmeta.

Dr Zijad Hasić je istakao da je Služba za razvoj i poduzetništvo Općine Tuzla 17.3.2009. podnijela Parlamentarnoj skupštini BiH Zahtjev za autentično tumačenje člana 99. Zakona o veterinarstvu u Bosni i Hercegovini („Službeni glasnik BiH, broj :34/02). Ukazao je na činjenicu, da je ovaj predmet razmatrala Ustavnopravna komisija Predstavničkog doma.

Predsjedavajući Ustavnopravne komisije, predložio je diskusiju o ovom zahtjevu.

Nakon kraće diskusije, Ustavnopravna komisija jednoglasno je utvrdila da se zahtjev ne odnosi na autentično tumačenje kojim se utvrđuje istinitost, autentičnost i pravilan smisao nedovoljno jasne odredbe zakona i drugog propisa, odnosno općeg akta, te stoga nije potrebno sprovesti daljnju proceduru autentičnog tumačenja člana 99. Zakona o veterinarstvu u Bosni i Hercegovini („Službeni glasnik BiH, broj: 34/02).

U okviru tačke dnevnog reda „**Ostala pitanja**“, Komisija je, također, razmatrala pitanje posjete članova ustavnopravnih Komisije oba doma Parlamentarne skupštine Bosne i Hercegovine Parlamentu Švicarske. Komisija je podržala aktivnosti s Ambasadom Švicarske i odgovarajućim pojedincima i institucijama Švicarske o pomoći Švicarske našoj Parlamentarnoj skupštini BiH i ustavnopravnim komisijama, te traži saglasnost Kolegija Doma naroda za odobrenje ove posjete svim članovima Ustavnopravne komisije i službenicima iz ureda sekretara ustavnopravnih komisija.

Nakon toga, Komisija je završila svoju sjednicu u 14,30 sati.

SEKRETAR USTAVNOPRAVNE
KOMISIJE
dr. Zijad Hasić

PREDSJEDAVAJUĆI USTAVNOPRAVNE
KOMISIJE
Ivo Miro Jović